

四庫全書

子部

欽定四庫全書

子部

山堂肆考卷二十二

詳校官中書臣孫溶

主事臣祁韻士覆勘

總校官降調編臣倉聖脉

校對官主事臣陳墉

謄錄監生臣龐北懋

欽定四庫全書

山堂肆考卷二十二

明 彭大翼 撰

地理

湖

湖都也流瀆四面所隈都也

其區

大湖在蘇州府城南五十里禹貢謂之震澤周公爾雅謂之具區史記國語謂之五湖其地跨蘇常嘉湖四府

界一名笠澤一名洞庭張勃吳錄五湖者太湖之別名以其周行五百餘里故名五湖或又以太湖射陽湖上湖洮湖滬湖為五湖然按國語吳越戰於五湖直在笠澤一湖中耳則知或說非也十道記太湖發源湖州長興縣界入常州晉陵界又入無錫界晉陵之東入蘇州吳縣界廣三萬六千頃下有地道潛通龍威丈人之所居

匯澤

荊州記宮亭湖即彭蠡澤謂之彭蠡湖一名匯澤一名鄱陽一名揚瀾

揚浸

周禮揚州其浸曰五湖

荆藪

劉澄之荊州記華容縣東南有雲夢澤一名巴丘湖荆之藪也

分風

盛弘之荊州記宮亭湖廟神甚靈塗旅經過無不祈禱  
能使湖中分風而帆宋秦觀宿湖邊惜竹軒夢神女贈  
詩云不知水宿分風浦何似秋眠惜竹軒聞道文章妙  
天下廬山對面可無言

起雨

南康仁空山下有平湖湖中艣底浮出每動搖便起風  
雨

軒轅鑿

軒轅遊蜀見水多決之下流江湖皆溢乃鑿湖注水今  
洞庭其一也

始皇憩

錢塘記去邑十里有詔息湖父老相傳始皇巡幸經此  
暫息因以名湖

郎官

唐李白郎官湖序故人尚書郎張謂出使夏口沔州牧  
杜公漢陽宰王公觴于江城之南湖方夜水月如練清

光可擬張公殊有勝槩四望超然乃顧白曰此湖古來  
賢豪遊者非一而枉踐佳景寂寞無聞夫子可為我標  
之嘉名以傳不朽白因舉酒酌水號曰郎官湖亦猶鄭  
圃之有僕射陂也

太傅

常熟縣有太傅湖太傅即謝安也

龍目

劉植京口記秦始皇東觀龍目湖親見形勢曰此有天



子氣使赭衣之徒鑿湖中長岡使斷因改名丹徒

### 馬骨

荊州有大滙馬骨等湖夏水來則渺漭若海及冬水涸則平林曠澤四眺烟日

### 鷺飛

揚州記新城縣東有一山山上有湖湖中有一白鷺時或飛來不可常見

### 魚下

鄭緝之永嘉記懷化縣有蔣公湖父老相傳云先代有  
祭祀祈請者湖輒下大魚與之

五渚

戰國策秦與荆戰大破之取洞庭五渚

三山

劉澄之豫州記城父縣有巢湖周圍五里湖中有三山  
湖南有四鼎

銅船

劉欣期交州記交州有一湖百姓樵捕者見銅船出水  
上又有水牛在湖中

石函

吳志孫皓時吳郡臨平湖邊得石函中有小石青白色  
上刻作皇帝字因改元為天璽大赦

淪雞

酉陽雜俎句容縣吳瀆塘有半湯湖湖水半冷半熱可  
以淪雞魚誤入輒死

飲馬

五代史唐莊宗滅梁馬殷遣子希範脩貢京師莊宗問  
洞庭湖廣狹希範對曰車駕南臨纔堪飲馬耳上嘉之

黃蓬

沔陽州南黃蓬山下有黃蓬湖納茅埠口許家池諸水  
及連大舍白螺上洪等湖趨復車達新灘入江

青草

荊陵記巴陵有青草湖周圍數百里日月出沒其中以

湖南有青草山故名一名巴丘湖北連洞庭南接瀟湘  
東納汨羅之水每夏秋水泛與洞庭為一水涸則此湖  
先乾青草生焉杜甫詩洞庭猶在目青草續為名又云  
鮫室圍青草龍堆擁白沙

范蠡開瀆

長洲縣北境有蠡湖一名漕湖范蠡伐吳開蠡瀆以通  
此湖故名又句踐滅吳范蠡乘扁舟遊五湖終不返

張闓立塘

丹徒縣東南有新豐湖晉大興初晉陵內史張闓以所部四縣並天旱失田乃立曲阿新豐塘灌田八百餘頃因名新豐湖

乘鯉

八閩通志僊游縣東興泰里有九鯉湖漢何氏兄弟九人嘗止於南山而煉丹於湖側及丹成各乘一鯉仙去故名湖曰九鯉山曰九仙其仙甚靈閩人祈夢無不神

驗

射蛟

徽州府西南有黃墩湖昔有陳靈洗者夜夢人告曰吾數為呂湖蛟所困明日幸見助靈洗曰何以為識曰白練者我也及旦往視之見二牛相觸有白者困靈洗射黑牛死視之乃蛟也按靈洗休寧人侯景亂保歙黥以拒景梁武帝授以本郡呂湖即黃墩湖

山川如畫

建業有玄武湖一名後湖一名北湖一名蔣陵湖宋元

嘉中有黑龍見改今名立三神山于湖祀之南唐近事  
湖周圍數十里幕府雞籠二山環其西南蔣山諸峰列其  
左山川掩映如畫六朝舊跡多出其間一日諸老坐朝  
堂語馮謐舉唐賜賀知章鏡湖事曰非敢望此若得後  
湖一暢平生也徐鉉曰主上尊賢下士常若不及豈惜  
一湖所乏者知章耳馮大慙

燕雀助封

金陵城東有燕雀湖相傳今走馬橋東水平湖是也或



曰白蕩湖即其地窮神秘苑梁昭明太子有一琉璃盃  
紫玉盃既薨置梓宮後更葬為闈人攜入大航有燕雀  
數萬擊之武帝聞而異焉以賜大孫封墳之際復有燕  
雀數萬銜土助封墳側有湖後人因名燕雀湖

### 百石

沔陽州西有百石湖中為長隄為驛道亘十餘里舊植  
柳人馬往來其上亦一景也

### 三城

三城湖在江寧縣西南湖中舊有三少城故名沔陽州  
西有三陽湖東曰朝陽南曰南陽北曰水陽

長蕩

金壇縣東南有長蕩湖一名洮湖

短汀

短汀湖在沔陽州東受張家灞港接魯陽潭諸水經麻  
汀入白湖

芍陂

劉澄之豫州記陳縣北有芍陂湖魏將王陵與吳張休  
交戰處

高臺

高臺湖在沔陽州景陵縣東達回河口入漢

塔影

塔影湖在泗州西北日照龜山寺塔影落于湖故名

倉基

倉基湖在桃源縣治南東流達河入淮

千里

千里湖在溧陽東南陸機云千里尊羹末下鹽豉指此湖也

五部

五部湖在無錫縣東北東西二十里南北十里源濁流清

二派分流

高淳縣西南有丹陽湖中流與當塗縣分界東連石臼

固城二湖其源有三一出徽州黟縣為舒泉一出廣德州白石山為桐水一出溧水縣東廬山為吳漕水三源匯合其流分為二派一西出蕪湖一北出當塗姑孰溪入江

### 三縣分界

射陽湖在淮安山陽縣東南漢廣陵王胥有罪其相勝之奏奪王射陂即此濶三千丈許周圍三百里山陽海州寶應三縣分湖為界

雒城

崑山縣西北有雒城湖

馬鞍

鹽城縣北有馬鞍湖入侍其汜達射陽湖

日月

進賢縣有日月湖水涸則分而為二漲則合而為一中  
有石人灘古諺日月湖明良將出石人灘合狀元生

風波

沔陽州景陵縣東北有風波湖

知章詔賜

唐賀知章字季真越州人為秘書監開元中遷禮部侍郎兼集賢學士晚年號四明狂客天寶初請為道士還鄉里就求周宮湖數頃為放生池詔賜鏡湖剡溪一曲鏡湖在今紹興府城西南李白詩鑑湖三百里菡萏發荷花五月西施採人看湓若耶宋陸務觀有思故山鏡

湖詩

莘老家居

高郵城西有甍社湖宋崔伯易有賦其叙云孫莘老家於湖陰夜讀書覺窻明如晝循湖求之見一大珠其光屬天是年莘老登科黃庭堅詩甍社湖中有明月淮南草木借光輝

養武士

太子湖一名西池在金陵城北吳宣明太子所創晉明帝為太子時脩西池多養武士



溺宮人

落星湖在彭蠡湖西北湖中有小山相傳星墜水所化故湖名落星陳王僧辯破侯景於落星灣及宋孟太后過落星湖宮人舟覆溺死者十數惟太后舟無虞皆此處也

白馬

白馬湖在新安一在寶應蜀有白羊湖沔陽州有白鷺湖金壇有銅馬湖

白鹿

白鹿湖在邳州治南由小河及泗

縣淪

趙睦吳越春秋海鹽縣淪為柘湖徙居武康鄉故越地

城陷

青瑣高議今巢湖乃古巢縣一日江漲港有巨魚人取以貨市合縣食之有一老姥獨不食遇老叟曰此吾子也汝獨不食吾厚報汝若東門石龜目赤城當陷姥日

往觀有稚子訝之媵以實告稚子欺之以朱傳龜目媵見急出城有青衣童子曰吾龍之子也乃引媵登山而免

龍升

秦州記武都郡前有湖晉義熙初有白龍從湖中升天牛見

蘇東坡連守潁杭二州皆有西湖其初得潁也有潁人在坐云內翰只消遊湖中便可了郡事及守杭秦觀有

詩云十里薰風菡萏初我公所至有西湖却將公事湖  
中了見說官閑事也無按杭州西湖故明聖湖也周圍  
三十里三面環山谿谷縷注下有淵泉百道瀦而為湖  
漢時金牛見湖中人言明聖之瑞遂稱明聖湖以其介  
於錢唐也又稱錢唐湖以其委輸於下湖也又稱上湖  
以其負郭而西也又稱西湖東坡後謫惠州亦有西湖  
其詩云水光潑灑晴方好山色空濛雨亦竒欲把西湖  
比西子淡粧濃抹兩相宜林和靖詩混元神巧本無形

匠出西湖作畫屏春水淨於僧眼碧曉山濃似佛頭青  
藥櫃粉堵搖魚影蘭柱煙叢閣鷺翎往往鳴榔與橫笛  
斜風細雨不堪聽

水

淮南子曰積陰之氣為水水神曰天吳亦曰馮夷波  
神曰陽侯濤神曰靈胥

流濕

易乾卦水流濕火就燥

樂饑

詩陳風泌之洋洋可以樂饑注云可以玩樂而忘饑也

懷山襄陵

虞書湯湯洪水方割蕩蕩懷山襄陵注云懷包其四面也襄駕出其上也

浮天載地

玄中記天下之多者水馬浮天載地高下無不至萬物無不潤抱朴子記黃帝曰天在地外水在天外浮天而

載地者水也

上善

老子曰上善若水水善利萬物而不爭處衆人之所惡故幾於道

乘衰

淮南子曰水之性乘勢而行乘衰而流注云衰下也

智者樂

論語智者樂水

君子觀

荀子曰孔子觀於東流之水子貢曰君子所以見大水必觀焉何也孔子曰夫水至柔而無為也似德其流也卑下倨拘必循其理似義其泔泔乎不涸盡似道其赴百仞之谷不懼似勇主量必平似法盈不求概似正淖約微達似察以出以入以就鮮潔似善其萬折也必東似志

習坎



易坎卦水洊至習坎君子以常德行習教事

盈科

孟子曰流水之為物也不盈科不行

觀呂梁

莊子曰孔子觀呂梁懸水三十仞流沫四十里鼃鼃魚鼈不能游見一丈夫游之與沒俱入與汨俱出

遊濠梁

莊子與惠子遊於濠梁莊子曰儵魚出游從容是魚樂

也。惠子曰：子非魚，安知魚之樂也？莊子曰：子非我，安知我不知魚之樂也？

民狎

左昭二十一年，子產曰：火猛烈，民望而畏之，故鮮死焉；水懦弱，民狎而玩之，則多死焉。

人輕

淮南子曰：土地各以類生，人清水音小，濁水音大，湍水人輕，遲水人重。

彰五色

禮學記水無當於五色五色弗得不彰

生萬物

淮南子曰天下之物莫柔弱於水上天則為雨露下地則為潤澤萬物不得生百事不得不成

吳猛畫扇

吳猛濮陽人仕吳為西安令因家分寧性至孝遇至人丁義授以神方嘗渡江值風濤猛以白羽扇畫水而渡

曇隱供厨

金陵鍾山之東靈谷寺有八功德水昔梁胡僧曇隱寓錫於此乏水時有飛眉叟謂曰予山龍也措之無難俄而一泓水沸出宋曾拯詩數斛供厨替八珍穿松漱石瑩心神中涵百衲煙霞色不染齊梁歌舞塵按八功德水一清二冷三香四柔五甘六淨七不噎八除病也又闕內八水一涇二渭三灞四滻五澇六滴七澧八瀉也

宗海

詩小雅沔彼流水朝宗于海

成淵

荀子曰積水成淵蛟龍生焉

高前帝漿

山海經高前之山其上有水甚寒而清帝臺之漿也

亳州聖水

唐李德裕傳亳州浮屠詭言有水可愈疾號曰聖水

汀水獨南

天下水皆東惟汀水獨南南丁位也以水合丁為汀故  
福建有汀州府蓋取此義又林氏曰衆水皆東而弱水  
獨西黑水獨南因其性與勢之自然也

闐水皆西

漢張騫言于闐之西水皆西流注西海其東水皆東流  
注鹽澤元楊廉夫曰佛居大地之陰西域也日必後照  
地皆西傾水皆西流故言性以空孔子居大地之陽日  
必先照地皆東傾水皆東流故言性以實亦地氣有以

使之然歟

宜禾宜黍

淮南子曰洛水宜禾渭水宜黍夔州府東有東瀼水號  
東屯宜瓜疇芋區西瀼水號西屯所宜亦同

出鰕出鮒

陝西漢中府沔縣有度水水有二源曰清檢濁檢清水  
出鰕魚濁水出鮒魚常以二八月取之

如象如馬

寰宇記灩澦堆冬來出水二十餘丈夏水漲半沒在夔州巫峽口方輿勝覽在夔州西二百步瞿塘峽口蜀江之心土人諺云灩澦大如象瞿塘不可上灩澦大如馬瞿塘不可下峽人以為水候

如絲如霧

長沙府醴陵縣學前有淥水湧出自地脈如絲如霧用白器入水酌而澄之其色深綠可以書字每出則其年登科者必多



李冰防患

秦李冰為蜀守以岷山通江為四瀆之首水或為患乃作三石人以止江水作三石牛以壓水怪分為三十六江以資灌溉由是人無水旱之患號為陸海蜀人德之宋子京文翁祠碑蜀廟食千五百年而不絕者秦李冰漢文翁而已

王商止訛

漢書建始中京師無故相驚言大水至成帝召公卿議

大將軍王鳳以為太后與上及後宮可御舟船令吏民上長安城以避水左將軍王商獨曰自古無道之國水猶不冒城郭今聖政和平上下相安何因當有大水一日暴至此必訛言也不宜重驚百姓上乃止有頃長安定問之果如商言

洗耳

皇甫謐高士傳許由字武仲堯聞其賢欲致天下而讓焉乃退而遁於中嶽潁水之濱箕山之下堯又名為九

州長由不欲聞洗耳於潁濱時有巢父牽犢欲飲之見  
由洗耳問其故對曰堯欲召我我惡其聲是故洗耳巢  
父曰子若處高岍深谷人道不通誰能見子子故浮游  
欲聞求其名譽汚吾犢口牽犢上流飲之

### 染足

筆談漳水界有水號烏脚溪涉者足皆如墨數十里間  
水皆不可飲飲則病瘴行人皆載水自隨梅龍圖儀官  
州縣時汙滌至漳州素多病預憂瘴癘為害至烏脚溪

使數人肩荷之以物蒙身恐為毒水所沾驚惕過甚睢  
盱矍鑠忽墮水中至於沒頂乃出之舉體黑如崑崙自  
謂必死然自此宿病盡除頓覺康健

灌城

戰國策智氏最強滅范中行氏又帥韓魏圍趙襄子於  
晉陽決晉水灌其城不浸者三板耳

沒湖

淮南子曰歷陽有老嫗嘗行仁義有過之者謂曰此當

沒為湖視東門有血便走上山勿反顧也自此媼數往  
視門門吏問之媼對如其言吏殺雞以血塗門明日媼  
早往視門有血便走上山歷陽遂沒為湖

止淫

淮南子曰往古之時四極廢九州裂水浩瀚而不息於  
是女媧氏積蘆灰以止淫水

流恨

杜詩第五橋東流恨水皇陂岸北結愁亭注云第五橋

皇子陂皆在長安城外乃會別之所也

出曰

呂氏春秋有佚氏女子採桑得嬰兒於空桑之中獻之其君命庖人養之察其所以然曰其母在伊水上嘗夢神告之曰白水出而東走毋明日視白果出水告其隣東走十里而故邑盡為水身因化為空桑故命其子曰伊尹

覆籠

續述征記梁鄒城西有籠水相傳齊孝婦誠感神明涌泉發於室內潛以績籠覆之由是無瓮汲之勞家人疑之時其出而搜其室試發此籠而泉遂涌流漂居宇故名籠水

### 轉宮

東漢宦官張讓趙忠說靈帝鑄天祿蝦蟆吐水於平門外橋東轉水入宮又作翻車渴烏施於橋南用灑南北郊路以為可省百姓灑道之費按天祿即蝦蟆也伯樂

之子按圖索驥以蝦蟆為馬即此翻車轉動之器激水而上者渴烏受水之器如鳥之渴飲故名渴烏

入殿

唐高宗永徽五年上在萬年宮夜大雨水衝入玄武門衛士皆走郎將薛仁貴曰天子有急敢愛死乎登門枕大呼以警宮內上遽出乘高俄而大水入寢殿漂沒三千餘人

濯錦



見江

漬粉

荊州記筑陽縣西有粉水源出房陵縣取其水為粉鮮  
潔異於他水雍州記蕭何夫人嘗以此水漬粉

臭過椒蘭

列子曰禹治水土迷之一國無風雨霧露不生鳥獸有  
山若壺頂有口若圓環名曰滋穴有水湧出名曰神瀆  
臭過椒蘭味過醪醴

利穿金石

淮南子曰水之為物擊之無創射之不傷斬之不斷焚之不能利穿金石功濟天下

夫餘沈羽

廣志弱水在夫餘北其水不勝毛羽柳子厚云西海之山有水焉散渙無力不能負芥投之則委靡墊沒及底而後止

河東化血

崔豹古今注漢安帝延平中河東水化為血元初中潁川襄城水化為血不流

方玉圓珠

尸子曰凡水方折者有玉圓折者有珠清水有黃金龍淵有玉英

冬凝春泮

淮南子曰夫水向冬則凝而為冰向春則泮而為水

易牙嘗

列子曰白公問於孔子曰人可與微言乎孔子不應白公曰若以石投水何如孔子曰吳之善沒者能取之曰若以水投水何如孔子曰淄澠之水易牙嘗而知之白公曰人故不可與微言乎孔子曰何為不可唯知言之謂者乎知言之謂者不以言言也注云白公欲為亂而不敢顯言求決於孔子孔子知其意故云云按淄澠二水名淄水在青州府城西源出泰安州萊蕪縣原山流達臨淄至壽光縣入濟水禹貢維淄其道即此澠水源

出青州府臨淄縣西申門之申池即左傳所謂齊懿公  
遊於申池是也申池水一支西流為系水一支北流為  
澠水左傳所謂有酒如澠魯仲連謂田單騁乎淄澠之間淮  
南子謂易牙嘗淄澠而別之者即此易牙雍人名巫牙  
其字也

德裕辯

中朝故事唐李德裕作相有奉使京口者李令還日金  
山下楊子江南冷水取一壺來其人舉棹日醉而忘之

泛舟回至石城下方憶其言乃汲一瓶歸京獻之李公  
飲後嘆訝曰江表水味有異于往歲矣此水頗似建業  
石頭城下水其人謝過不敢隱

龍吟

肇慶府開建縣東金縷村唐狀元莫宣卿讀書堂在焉  
水流清響父老呼為龍吟水

雞浴

廣州府石康縣東有金雞水相傳昔有金雞浴於水傍

故名

請以身填

漢書王尊字子贛為東郡太守河水泛溢浸瓠子金堤尊投白馬祭水併劾水神河伯請以身填金隄因止宿廬居隄上及水盛隄壞吏民奔走尊立不動而水波稍退

能以氣禁

抱朴子曰左慈能以氣禁水水為之逆流一二丈禁水

置庭中露之即大寒不冰

流桑

安慶府宿松縣南九江口有桑落洲昔江水泛漲流一桑樹於此洲因名晉劉毅與盧循戰於桑落洲即此又按洲在大江中江北則安慶府宿松縣相距百餘里江南則江州湖口縣也

承瓠

博物志庭州灞水以金銀鐵器承之皆漏唯承以瓠葉



則不漏

文公儲船

東漢書任文公為治中時天旱白刺史曰五月一日當有大水宜預儲船刺史不聽百姓有信其言預為防者至其月日中雲起須臾雨至晡時水湧起十餘丈突壞廬舍所害至數千人

龍澄獲印

大瀼水在夔州府東自達縣萬頃池發源宋洪邁夷堅

志宣和中龍澄嘗於灑水中獲玉印印文非世間篆籀  
澄見天神立於傍曰此印上帝所寶今守護不謹遂落  
於此神俄不見澄懼乃奉印投原處

流出名山

博物志八流皆出名山渭出鳥鼠漢出蟠冢洛出熊耳  
涇出少室汝出燕泉泗出陪尾沔出月台沃出泰山

源出桃林

永嘉郡記桃枝水源出東陽長山縣桃林之下

水有四德

尸子曰水有四德沐浴羣生通流萬物仁也揚清激濁  
蕩去滓穢義也柔而難犯弱而難勝勇也導江疏河惡  
盈流謙智也

水有七種

唐張又新為水說七種其二惠山泉三虎丘井四松江  
按又新元和中狀元及第

秘省極佳

茶錄唐秘省中有水極佳名秘水

下箸極美

長興縣有箸溪生箭箸南岸曰上箸北岍曰下箸土人  
取下箸水釀酒味極醇美白樂天詩勞將下箸忘憂物  
寄與江城愛酒翁

士龍顧影

晉陸士龍常著縑絰上船於水中顧影大笑落水人亟  
救之免溺

趙軌比清

隋趙軌為齊州別駕文帝徵入朝父老送者曰別駕在官水火不與百姓交是以不敢以杯酒相送公清如水請酌一杯水奉餞軌受飲之

子瞻符取

東坡曰余愛玉女河水破竹為契使寺僧藏其一以為往來之信謂之調水符其詩云欺謾久成俗關市有棄繻誰知南山下取水亦置符古人辨淄澠皎若鶴與鳧

吾今既謝此但視符有無常思汲水人智出符之餘多  
防竟無及棄置為長吁

鴻漸杓揚

張又新水錄唐李季卿刺湖州至維揚遇陸鴻漸謂曰  
陸君善茶天下所聞揚子南泠水又竒絕今者二妙千  
載一遇何可輕失乃命軍士謹信者挈瓶操舟深詣南  
泠陸潔器以待俄水至陸以杓揚水曰江則江矣非南  
泠者似臨岸水使者稱不敢給既而傾諸盃至半遽止

又以杓揚之曰此南冷者矣使者蹶然駭曰某自南冷  
齋水至岸舟盪去其半懼其少取岸水增之處士之鑿  
神鑿也李大驚

時平乃清

宋博士吳淑水賦新豐則時平乃清臨淄則世亂而竭  
按唐書新豐鸚鵡谷水清世傳谷水清天下平述征記  
臨淄牛山下有女水齊人諺世治則女水清世亂則女  
水竭故慕容超時乾涸彌載及宋武北征乃激洪流

風起輒動

吳孫權至湓城自標井地令人掘之得故井銘曰漢潁陽侯灌嬰所開井甚深遇江中風浪起此井水輒動

黑水

黑水源出陝西行都司肅州衛城北十五里又地志云黑水出張掖縣雞山

白水

源出肅州衛城西南二十里下流與紅水黑水合



紅水

源出肅州衛城東南山谷中下流與黑白水合

藍水

杜詩藍水遠從千澗落

五渡水

韶州圖經曲江縣脩仁水北有三楓亭五渡水齊范雲  
為始興守至脩仁水酌而飲之賦詩云三楓何習習五  
渡何悠悠又陶秀實清異錄武夷山有石如立壁巔隱

一泉分七派山僧顛堅名為七絃水

三泖水

三泖水在松江府城西南即華亭谷水也晉陸機對武帝云三泖冬溫夏涼而圖經又以泖有上中下之名舊縣圖以近山涇圓者曰圓泖近泖橋濶者曰大泖自泖而上縈繞百餘里者曰長泖

泉

爾雅水本曰源源曰泉正直上出曰檻泉從上溜下

曰下泉湧出曰瀆泉側出曰汎泉所出同所歸異曰肥泉異出同流曰瀆泉

刺山

漢書李廣利為貳師將軍伐大宛還士衆渴甚廣利拔佩刀刺山飛泉湧出

拜井

東漢耿恭字伯宗為戊己校尉疎勒城傍有澗水匈奴來攻據澗上流絕之士卒不得飲恭於城中穿井十五

丈無水乃嘆曰昔貳師將軍拔刀刺山而泉湧乃整衣  
向井再拜為士卒禱有頃飛泉奔出衆皆稱萬歲因揚  
水示虜虜以為神遂引去

盤龍

酉陽雜俎元街縣有泉眼中水旋如盤龍或試撓破之  
尋手成龍狀驢馬飲之皆驚走

走蛇

六帖楊師晟師次方渠水乏有青蛇下走視其跡水從

而流使築防環之遂為停淵軍士仰足命泉曰應聖

### 石門貪泉

晉吳隱之字處默為廣州刺史石門有貪泉俗云飲此  
水者廉士皆貪隱之酌而飲之為詩曰古人云此水一  
飲懷千金試使夷齊飲終當不易心又唐馮立為廣州  
都督見貪泉曰此豈隱之所酌耶吾雖日飲此水庸易  
吾性哉遂極飲而去

### 梁州廉泉

梓潼人范柏年初見宋明帝言及廣州貪泉帝因問卿  
鄉土復有此泉否答曰梁益間惟有文川武鄉廉泉讓  
水不聞有貪泉又問卿宅在何處曰臣所居在廉讓之  
間帝嗟其善對即拜梁州刺史

鬱林瑞泉

鬱林城南南流江之濱有紫泉宋嘉定中改名瑞泉元  
至治初御史張思敬鑄瑞泉二字勒碑於上泉遂竭居  
人去其碑泉復如舊

新喻醴泉

臨江府新喻縣西有醴泉宋黃庭堅過此飲之而甘曰  
惜張又新陸鴻漸不及知也因題其旁柱曰醴泉

蒼梧漫泉

梧州府蒼梧縣東門外有水井南對火山唐大厯三年  
經略使元結飲之甘冽作漫泉銘有火山無火水井無  
冰之句宋紹興間知州任詔砌為雙井至今一清一濁  
皆深可六七尺

日南淫泉

拾遺錄日南有泉曰淫泉男女飲之則淫又妙德先生嘗謂人曰昔有一國有狂泉飲之無不狂者國君穿井自飲獨得無恙國人反謂國君不狂為狂聚謀共執國君灸艾針藥畢具國君不任其苦酌泉飲之即狂矣按妙德先生傳袁粲作

取泉置甌

芝田錄唐李德裕任中書愛飲常州惠山寺泉自甌至



京置遞鋪號水遞有一僧謁見曰所謁相公者為相通  
常州水脈京師一眼井與惠山寺泉脈相通德裕大笑其荒  
唐僧曰相公欲飲惠山泉當在昊天觀常任庫後取德裕  
乃以惠山一甕昊天一甕雜以他水八瓶暗記其處遣僧辨  
析僧因啜嘗止取惠山寺與昊天觀二甕德裕大奇之即  
停其水遞由是人不告勞浮議遂息按惠山或曰慧山

酌泉題楹

衡州府北甘泉寺有萊公泉宋寇萊公南遷日題於東楹

曰平仲酌泉經此回望北闕黯然而去未幾丁謂之過此題於西楹曰謂之酌泉禮佛而去范諷留詩於寺曰平仲酌泉回北望謂之禮佛向南行烟嵐翠鎖門前路轉使高僧厭寵榮淳熙中南軒張拭榜此泉曰萊公泉又青州府西門外有范公泉宋范仲淹知青州有惠政洋溪側出醴泉人以范公目之今醫家用以丸藥名青州白丸子

一冷一温

唐子西遊湯泉記惠州過水十餘里得白水山行一里

許得佛跡院院中湧二泉一冷一溫二泉相去步武間而東泉熱甚殆不可觸指以西泉解之然後調適可浴  
半冷半溫

江乘縣東南有泉半冷半溫共出一壑又郴州永興縣南有圓泉半煖半冷冷處極清煖處極濁

### 卓錫

唐子西卓錫泉記吾遊羅浮至寶積寺飲泉而甘寺僧曰此卓錫泉也昔梁景泰禪師居此山其徒以無水難

之師笑而不答已而庵成師卓錫于地泉湧數尺自是  
得井山中賴之

投金

杜陽雜編滄洲久視山下出澄綠泉亦謂之流綠渠投  
之金石終不沈沒

濺珠

四川龍州宣撫司東泉瀉石崖噴激如珠名濺珠泉

粲玉

四川黎州安撫司南有祭玉泉俗傳唐三藏至此持梵音而泉湧名梵音水宋政和間太守宇文侯過而飲之曰佳泉也易名祭玉

### 瀑布

瀑布泉是處有之李白廬山瀑布詩日照香爐生紫烟遙看瀑布挂前川飛流直下三千尺疑是銀河落九天

### 濯纓

濯纓泉在成都府什邡縣北宋程珣有詩一在荊州府

歸州東南內有神蛇人穢其水其蛇輒見

白道

大同府有白道泉即飲馬長城處

紅泥

臨洮府蘭縣東有紅泥泉出臯蘭山下

平疴

平疴泉在和州北其水甚溫梁昭明太子浴於此蘇軾  
秦觀劉貢父皆有詩

知時

道州望仙門內有知時泉鑿石象龍以道其流夏至則  
盈秋分則涸宋紹興間郡守辛公創亭而扁之

鶴鳴

鶴鳴泉在潛山縣西真源宮四時不竭相傳白鶴道人  
嘗止此

虎跑

虎跑泉一在杭之南山大慈寺距城十里唐性空大禪

師來遊此山以無水將他之忽神人告曰自師來我等  
徼惠甚大柰何棄去南岳童子當遣二虎來移師無憂  
也翌日果見二虎跑山出泉甘冽勝常大禪師因留建  
立伽藍蘇東坡詩有虎移泉趁行脚蓋紀實云

金沙

金沙泉在湖州府顧渚山唐時進紫筍茶太守具牲幣  
祭之泉始發源供御者畢水即微減供堂畢水即減半  
太守造茶畢即涸矣元正元間中書省官致祭一夕水



湓可溉田千頃賜名瑞應泉

玉液

玉液泉在隆慶府西南元時取造玉液酒故名又江州有寶盃泉徐陵文泉流寶盃遙憶湓城

舞水

南陽府舞陽縣東南三河南岸有舞水泉泉踴躍若舞故名

滑石

桂林府靈川縣北有龍隱泉舊名滑石泉宋鄒浩詩馬  
頭今日度嚴關十九年前去復還惟有流泉聲似舊凭  
欄重聽響潺湲

一人

一人泉在金陵鍾山高峰絕頂僅容一勺挹之不竭王  
安石詩蹇淺一人泉

七賢

七賢泉在衛輝府輝縣山陽西社七賢竹林七賢王戎

向秀等也

喜客

喜客泉在茅山客至則泉湧出

惠民

惠民泉在漳州府城北門外

君子

君子泉在黃州府治北宋通判孟震亭有賢德時稱君子庭中有泉蘇東坡因名之黃庭堅詩雲夢澤邊君子

金史卷之二十一  
卷二十二  
泉水無名字託人賢

老翁

老翁泉在眉州墓頤山東其山高大分為兩股泉出兩股之間北附右股之下畜而為井日可飲百家宋蘇洵嘉祐集云十數年前月夜有一老翁蒼顏白髮偃息泉上就之則隱而入於泉弗見洵覓以石建亭覆之因作銘

十九

十九泉在鞏昌府成縣杜詩近接西南地常懷十九泉

六一

宋歐文忠公將老自號六一居士杭州西湖僧惠勤能詩嘗受知於公後公薨勤亦逝勤弟子畫六一公像與勤像而祀之有泉出講堂下蘇東坡守杭遂本勤意而名之曰六一泉因為之銘

雌雄

雌雄泉在夔州府梁山縣多喜山下有雌雄二泉春夏

左盈右竭秋冬左竭右盈

男女

梧州府陸川縣有溫泉在妙峒水旁自竅中出泉有二  
左曰男泉右曰女泉

五眼

五眼泉在臨洮府蘭縣臯蘭山下泉有五眼故名相傳  
霍去病擊匈奴至此以鞭卓地而泉出成都府茂州治  
有五福泉吳江縣南有六品泉唐陸羽品為第四泉宋

張又新品為東南第六泉

百脈

百脈泉在濟南府章丘縣南百脈俱發故名宋曾鞏云  
歷下諸泉皆岱陰伏流所發西則趵突為魁東則百脈  
為冠

杜康釀酒

杜康泉在濟南府舜祠西廡下世傳康於此釀酒或以  
楊子江心水及惠山泉秤之一升各重二十四銖是泉

重二十三銖

陸羽試茶

湖廣沔陽州景陵縣西北有文學泉唐陸羽得此泉以試茶故名

妬女

述異記妬女泉在并州凡婦女靚粧彩服至其地者必興雷雨

僕夫



僕夫泉在杭州孤山僧智圓有僕夫藝竹得泉故名  
又元時僧芳洲鑿地得此泉遂名後僕夫泉

細水

細水泉在大同府盂縣東其泉細微而縈迴不絕

小山

遼東都司義州衛西北有小山泉按明朝遣將征虜聞  
虜王脫古思脫木兒在捕魚兒海遂由大寧慶州蕪道  
而進軍士無水渴甚忽聞其地有聲如駁使人視之則

泉水奔流士馬就飲衆咸歡呼曰此朝廷之福也先是  
上嘗夢殿西北隅有小山流泉直下至御足所履而止  
至是小山泉湧適與夢符

菩薩

蘇東坡序寒溪少西數百步則為西山寺有泉色白而  
甘號菩薩泉李常侍謂予曰豈昔阿育王所鑄文殊金  
像所在乎

羅漢

羅漢泉在瑞州府五峰山上有羅漢像橫臥水際故名

阿對

河南閩鄉縣西南有阿對井一名阿對泉按阿對本東漢楊震家僮嘗引此井泉灌蔬故唐吳融閩鄉卜居詩六載抽毫侍禁闈可堪衰病決然歸五陵年少如相問阿對泉頭一布衣

參寥

參寥泉在西湖智果寺事見清明淘井

墜筆

荊州府松滋縣南苦竹寺有竹泉宋至和初有僧浚井  
得一筆後黃庭堅謫黔過此視筆曰此吾蝦蟇培所墜  
也因知此泉與蝦蟇培相通

滌鉢

南雄府始興縣連城寺有洗鉢泉相傳大士雲遊至此  
滌鉢

撫掌

圖經餘杭縣洞霄宮有撫掌泉相傳錢武肅王至宮撫掌而泉湧出

滴乳

四川順慶府西有滴乳泉昔有道士何志全飲此泉年八十面如桃紅

潛虬

宜興縣頤山有潛虬泉幽深澄澈中有異魚四足能行率數歲一出出必有水災

鳴犢

鳴犢泉在西安府城南鳴犢鎮相傳因犢跑鳴得泉故

名

馬踐

隋史烏鼠山俗呼高武隴其下渭水所出絕壁千仞諸  
羌馬足所踐忽飛泉湧出號玉漿泉

燕來

彬州府西有燕泉以燕來時泉生去時泉涸故名宋折

彦質居彬剪茅為亭名燕泉亭

靈砂

圖經黃山東峰下有朱砂湯泉可以點茶春時色即微  
紅昔人題詩三十六峰高倚天瑤臺金闕貯神仙嵩陽  
居與黃山比猶少靈砂一道泉

礪石

茗溪漁隱東坡所記湯泉秦川之駱谷渝州之陳氏山  
居秦君之賦東城及匡廬汝水尉氏驪山後謫居惠州

遊白水山佛跡巖浴於湯泉共有其八矣余之所見新安之黃山閩中之劔浦亦有其二矣第湯泉多作硫黃氣浴之則襲人肌膚惟驪山是礪石泉並無此氣

玉龍

地理志唐天寶六年更溫泉湯曰華清宮湯治井為池環山列宮室制度宏麗安祿山在范陽以玉魚龍鳧鴈石梁石蓮花以獻上悅命陳於湯中因幸焉將解衣而入魚龍鳧鴈皆奮鱗舉翼狀若飛動上因恐却之



石鱗

河南登封縣嵩山有白龜泉泉有石鱗客問道士楊洞  
曰鱗旁行天性乎洞微以手指之即直行

感應

感應泉在平樂府城北宋鄒浩謫居昭州以江水不可  
飲汲于數里外後所居嶺下有泉湧出及將北歸數日  
前泉乃涸旋有人至門上厲聲曰侍郎歸矣翌日果拜  
命歸至常州卒楊時挽詩泉甘不出戶客至豈無神

安樂

叙州府涪溪側有泉味甘美盛夏水冽冬月則溫黃庭堅號為安樂泉謂飲之令人安樂也

猪龍

眉州城石佛鎮乃蘇軾別業有猪龍泉軾嘗云聞百年前有牝猪伏於此化為二鯉蓋猪龍也世莫有見者余偶見之以告妻兄王愿愿疑余誕因禱於泉二鯉復出疑始釋

蝦蟆

蝦蟆泉在河南陝州城西門外水自石眼中流出内生  
科斗禱雨即應唐韓文公詩居然鱗介不能容石眼環  
環水一鍾聞道旱天祈得雨只疑科斗是蛟龍

穿巖越壑

詩史唐宣宗微時以武宗忌之遊跡為僧游方外與黃  
蘗禪師同觀瀑布泉禪師一聯云穿巖越壑不辭勞倒  
底方知出處高宣宗續之曰溪澗豈能留得住終歸大

海作波濤

涵雲注玉

宋秦少游湯泉賦大江之濱東城之野有泉出焉直回  
峰負深谷分埒引源迤邐相屬晨夜有聲涵雲注玉薄  
為虎鬚狀為魚目鱗介莫潛遇者斯浴此何水也哉野  
老告余曰泓泓洎洎莫虞歲年不火而燠其名溫泉嗚  
呼豈非榮惑蒞於上耶燭龍隱於中耶旁通咸池日御  
之所經耶幽精沈魄陰賞其負耶丹砂黃硫金石之氣

酷悍之所激耶

霹靂

南安府大庾嶺有霹靂泉相傳宋時大旱有僧致禱一夕大雷雨泉出於竇故名

參斗

湖廣均州東有參斗泉雖千人汲之此水不減不汲亦不增相傳參斗二星下臨故名

一脈縈莎

鄭谷石門山泉詩一脈清泠何所之  
縈莎漱蘚入僧池

萬音落石

王介甫水簾泉詩淙淙萬音落石巔  
皎皎一派當簷前  
清風高吹鸞鶴淚  
白日下照蛟龍涎  
浮雲裝額自能掩  
缺少琢鈎相與懸  
朱門試問幽人價  
翡翠鮫綃不值錢

湧出玉壺

濟南府西有趵突泉一名瀑流出山西王屋山下元趙孟頫詩灤水發源天下無平地湧出白玉壺  
谷虛只恐

元氣泄歲旱不愁東海枯

界破冰綃

金線泉在濟南府西石甃方池泉亂發其下東注城濠  
澄澈見底有金線一道隱起水面宋曾鞏詩玉甃常浮  
顯氣鮮金絲不定路南泉無風到底塵埃盡界破冰綃  
一片天

明月

明月泉在太原府五臺山中俗傳以紗帛障目下視或

見月在水中

白雲

白雲泉在吳縣天平山白樂天題以絕句范文公繼此  
有作泉名遂著

天齊

齊地記泉中流出瓦瓦上有天齊二字晏子曰吾聞江  
深五里海深十里此泉與天齊也

雨湧



袁州府楊岐山有雨湧泉相傳與海通天欲雨泉水先湧宋周允詩楊岐山下出靈泉與海相通亘古傳洶湧便知天欲雨為言陰石不須鞭

蘆葭

酉陽雜俎玉門有蘆葭泉周二丈深一丈駝馬千頭飲之不竭

茯苓

茯苓泉在杭州府靈隱寺後山古松婆娑泉極甘冽

谷簾

谷簾泉在南康府西其水如簾布巖而下者三十餘派  
唐陸羽茶經品其水為天下第一按此水出康王谷中

石臼

圖經施州南寨石臼溪旁其泉源有七眼


上善

唐地理志坊州谷中無水東北七里有上善泉開成二  
年刺史張怡架水入城以紓遠汲四年刺史崔駢復增

脩之民獲其利為立祠祀之

潤德

潤德泉在鳳翔府岐山縣西北周公廟傍相傳時平則  
流亂則竭宋雍熙中賜今名有碑記



山堂肆考卷二十二

欽定四庫全書

子部

山堂肆考卷二十三  
四

詳校官中書臣孫溶

主事臣祁韻士覆勘

總校官降調編修臣倉聖脉

校對官主事臣陳墉

謄錄監生臣馮光熙

欽定四庫全書

山堂肆考卷二十三

明 彭大翼 撰

地理

潮

抱朴子曰月精生水故月盛則潮大

盈虛繫月

盧肇海潮賦序夫潮之生因乎日也其盈其虛繫乎月也日激水而潮生月離日而潮大此不刊之理也余道

安海潮圖序陽燧取火於日陰鑑取水於月各從其類也故月臨卯酉則水漲於東西月臨子午則潮平於南北彼竭此盈往來不絕皆繫於月不繫於日

往來應期

高麗圖經潮汐往來應期不爽為天地之至信古人嘗論之在山海經以為海鰭之出入浮屠書以為神龍之變化竇叔蒙海嶠志以為水隨月之虧盈盧肇海潮賦以為日出於海衝擊而成王充論衡以為水者地之血

脈隨氣進退率未之盡大抵天包水水承地而一元之氣升降於太空之中地乘水力以自持且與元氣升降互為抑揚而人不覺亦猶坐於船中而不知船之自運也方其氣升而地沈則海水溢而為潮及其氣降地浮則海水縮而為汐計日十二辰由子至巳其氣為陽而陽之氣又自有升降以運乎晝由午至亥其氣為陰而陰之氣又自有升降以運乎夜一晝一夜合陰陽之氣凡再升再降故一日之間潮汐皆再焉又曰當卯酉之



月則陰陽之交也氣以交而盛故潮之大獨異於餘月  
當朔望之後天地之變也氣以變而盛故潮之大獨異  
於餘日

旗迓

臨安志吳王既賜伍子胥死乃取其屍盛以鴟夷之革  
浮之江中子胥因流揚波依潮來往蕩激隄岸勢不可  
禦或有見其乘素車白馬在潮頭者因為立廟仲秋既  
望潮水極大杭人以旗鼓迓之弄潮之戲蓋始於此又

云子胥死戒其子曰投吾於江中吾當朝暮乘潮以觀  
吳之敗自是海門山潮頭洶湧高數百尺越錢塘魚浦  
方漸低小

### 弩射

梁開平四年武肅王錢鏐始築捍海塘在候潮通江門  
外潮勢衝激版築不就因命強弩數百以射潮頭又數  
禱於胥山祠既而潮水避錢塘衝擊西陵遂成隄岸蘇  
東坡詩江神河伯兩醢雞海若東來氣吐霓安得夫差

水犀手三千強弩射潮低仇近仁詩一痕初見海門生  
頃刻長驅作怒聲萬馬突圍天鼓碎六鼉翻背雪山傾  
遠朝魏闕心猶在直上巖灘勢始平寄語吳兒休踏浪  
天吳罔象正縱橫

半東半西

嶺外錄異欽廉之潮朔望則大謂之先水日止一潮謂  
之小水瓊海之潮半月東流半月西流不繫月之盛衰  
再大再小

抱朴子曰潮者言朝來也汐者言夕至也一月之間天再東再西故潮水再大再小也又夏時日居南宿陰消陽盛而天高一萬五千里故夏潮大也冬時日居北宿陰盛陽消而天卑一萬五千里故冬潮小也春時日居東宿天高一萬五千里故春潮漸起也秋時日居西宿而天卑一萬五千里故秋潮漸減也

三日不至

宋德祐丙子元師入平安呂文煥時駐軍江磧宋方幸

元師阽危而海潮三日不至師迄無虞於是元獲占地  
利宋都以覆及祥興己卯元師下廣海張弘範遂進攻  
厓山衆欲退師少休而是日海潮不退勢難迴却於是  
元人盡日力戰宋祚以滅

三時為差

史氏伯璿曰余氏候東南二海之潮平於東者常先平  
於南者常後每於三時為差不知其所以有先後者何  
故蓋潮之長落不過以北水南水候之而已是故北水

南來則為長南水北來則為落是潮之長必自北而南也然後知東南二海潮候有不同者以此而已然猶未知潮之長必自北而南者又何故也蓋天以河圖示象於聖人聖人以易象示教於天下後世不信天與聖人尚誰信哉河圖以一六水居北而後天八卦之方位亦以坎為北方之卦坎之象非水乎是則北固水之定位也潮之自北而南者豈必外此而他求乎

三水相蕩

抱朴子曰天河從北極分為兩條至於南極其一經南斗中過其一經東斗中過兩河隨天轉入地過而下水相得又與海水合三水相蕩而天轉之故激湧而成潮

兩水相合

早潮下晚潮上兩水相合謂之沓潮

冰

禮月令孟冬之月水始冰地始凍仲冬之月水益壯地始坼季冬之月水方盛水澤腹堅

納凌陰

詩豳風二之日鑿冰沖沖三之日納于凌陰四之日其蚤獻羔祭韭注云凌陰冰室也

脩盛器

周禮天官凌人掌冰正歲十有二月令斬冰三其凌春始治鑑祭祀供冰鑑賓客供冰大喪供夷槃冰夏頒冰掌事秋刷注云三其凌三倍其水也鑑如瓶大口以盛冰置食物其中正月脩飾盛冰之器至二月將獻羔而



啟冰也夷尸也實冰於夷樂中置之尸牀之下所以寒  
尸夏四月掌事主賜冰之多少七月始刷冰室將納新  
冰

狐聽

離騷經注狐多疑而善聽河水合狐欲渡必帖耳先聽  
無水聲而後過故人過河者要須狐行然後敢渡

蟲疑

晉孫綽天台賦哂夏蟲之疑冰整輕翮而思矯按莊子

曰夏蟲不可以語於冰者篤於時也

### 藏山

左昭四年申豐曰古者日在北陸而藏冰西陸朝覲而出之其藏冰也深山窮谷洄陰沍寒於是乎取之其出之也朝之祿位賓客喪祭於是乎用之藏之也周用之也徧則冬無愆陽夏無伏陰民不夭札

### 薦廟

禮月令仲冬天子獻羔開冰先薦寢廟

梓慎占饑

見星淫枵

令狐夢立

晉令狐策夢立冰上與冰下人語索統占曰當為人作  
媒冰判時成婚忽遇太守田豹託策為媒求張公徵之  
女為婚至仲春果成

神人膚

莊子曰藐姑射之山有神人焉肌膚若冰雪

妃子淚

開元遺事楊太真初入宮與父母別淚落凍成紅冰

光武渡河

東漢光武至薊上王郎追兵至上發薊晨夜馳至潯沱  
河導吏還言河水流澌無船不可渡復遣黃霸往視霸  
恐驚衆還曰冰堅可渡比至河水已合帝遂得渡

慕容行海

見海

冰厚五寸

齊景公伐魯得東門無澤問曰魯年穀何如對曰陰不  
凝陽冰厚五寸寒溫節也寒溫節則政平政平則年穀  
孰請禮魯以息怨

冰厚六尺

漢晁錯上書胡貉之地積陰之處水皮三寸冰厚六尺  
神異經北方有層冰萬里厚百尺

北鼠

東方朔神異記北方冰厚百尺有鼠在冰上食其鼠毛  
長八尺可為布

東蠶

拾遺記東海員嶠山冰蠶長七寸有鱗角以霜雪覆之  
始作繭其色五彩織為文錦入水不濡投火不燎

投丸潰賊

東漢黃巾賊起青州刺史焦和恐賊乘冰渡河多作陷  
冰丸投河中賊衆遂潰

煮茗供賓

六帖逸人王休居太白山下每冬取溪水琢其精瑩者煮茗以供賓客

千年不釋

杜陽雜編拘彌國有大疑山其中有冰千年不釋謂之常堅冰

六月猶堅

戴延之西征記凌雲臺有水井延之六月持去經日其

冰猶堅

貯玉盤

拾遺記董偃以玉精為盤貯冰於內

玩玉筍

見冬至

瑯琊井

東漢書靈帝元和六年冬北海東萊瑯琊井冰厚丈餘

宣陽室



晉陸機洛陽記冰室在宣陽門內天子用以賜王公百官

象玉

曹植七忿素冰象玉難可磨蕩結土成龍遭雨則傷

比珠

顧愷之水賦縑白隨川方圓隨渠託形超象比朗玄珠  
積冰為樓

三輔黃圖漢建章宮北積冰為樓

敲冰成磬

宋楊廷秀詩稚子金盃照曉冰彩絲穿取當銀鈺敲成  
玉磬穿林響忽作玻璃碎地聲

子馮闕地

左襄二十一年楚子使蘧子馮為令尹蘧以疾辭方暑  
闕地下冰而牀馬重繭衣裘鮮食而寢楚子使醫視之復  
曰瘠則甚矣而血氣未動

楊氏琢山

見時令伏日

農桑起

家語霜降而婦功成娶者行焉冰泮而農桑起婚禮殺  
焉

男女合

風俗通周禮媒氏因三十之男二十之女冰泮鳴鴈於  
是乎合

賜汝南

八王故事汝南王葬詔賜冰五斛

送趙郡

北齊趙郡王叡為定州刺史監築長城有送冰者叡曰  
人皆飲溫水我何獨進寒冰遂至消不進軍中感悅

取冰無價

唐白樂天為刺史三年飲冰復食藥又止戈集長安冰  
雪至夏月則價等金璧惟白少傅詩名動於閭閻每需  
冰雪論筐取之不復償價

食水洗腸

宋程伯淳長嘯巖中食冰甚佳詩云車倦人煩渴思長巖中冰片玉成方老僊笑我塵勞久乞與雲膏洗俗腸

火

莊子曰木與火相摩則燃金與火相守則流白澤圖火之精曰宋無忌春秋考異火者陽之精

流為赤烏

史記武王渡河有火自上復下至於王屋流為烏其色

赤其聲魄

化為白雀

魚豢典略秦伯出獵至咸陽有大火流下化為白雀銜  
綠字青書集於公車

玉石俱焚

夏書火炎崑岡玉石俱焚

芝艾俱盡

淮南子曰順風縱火紫芝與蕭艾俱盡抱朴子曰慮巫

山之失火恐芝艾之并焚

春出秋內

夏官司燿掌火之政令季春出火民咸從之季秋內火民亦如之

春起秋滅

抱朴子曰南海蕭丘之上有自生之火春起秋滅丘生上一種木雖為火所著但小焦黑人或得以為薪炊熟則灌滅之用之不窮

守金則流

莊子曰木與火相摩則燃金與火相守則流

積油自生

博物志積油萬石則自然生火晉泰始中武庫火積油所致也庫有漢高祖斬蛇劍王莽頭孔子履盡焚焉

烏鳴社

左襄三十年五月或叫於宋太廟曰譫譫出出烏鳴於亳社如曰譫譫甲午宋大災宋伯姬卒君子謂宋共姬



女而不婦女待人婦義事也

鴉啄樹

拾遺記燧明國不識四時晝夜有火樹名燧木屈盤萬頃有鳥名鴉啄樹則燦然火出聖人感焉因取小枝以鑽火號燧人氏

樂喜塗屋

左襄九年春宋災樂喜為司城以為政使伯氏司里火所未至徹小屋塗大屋陳畚揭具綆在備水器量輕重

畜水潦積土塗巡丈城繕守備表火道使華臣具正徒  
令隧正納郊保奔火所

襄子燔林

列子曰趙襄子率徒十萬狩於中山藉苒燔林燔赫百  
里有一人自石壁中出從燼上下衆謂鬼神襄子徐察  
之形色七竅人也氣息聲音人也問奚道而處石奚道  
而入火其人曰奚物而謂石奚物而謂火按草芟陳者  
而新者又生曰苒

老槐

莊子曰老槐生火久血為燐燐野火也

槁竹

淮南子曰槁竹有火弗鑽不燃土中有水弗掘無泉

衛於白首

山海經崕山之上有一鳥焉其狀如鴉赤身白首名曰竊脂可以衛火又曰符愚之山有鳥名鷗其狀如翠而赤喙可以衛火

撲於青衣

拾遺記糜竺貲貨如丘山忽有青衣童子云君當有火  
厄賴君能惻愍枯骨故來襪却使君財物不盡焚之旬  
日火起燒其珠玉十分之一火盛之時見數十青衣童  
子來撲火有青氣如雲覆於火上童子又云多聚燕雀  
之類以襪災蓋燕能聚水巢梁也家人乃收集鷓鴣數  
十養於池渠之中以厭火災

炎山草木

玄中記南山有炎火山四月生火十二月火滅火滅之後草木皆生枝葉火燃草木葉落如中國寒時也取此木以為薪燃之不盡以其皮績之為火浣布

夢澤雲霓

戰國策楚王遊雲夢野火之起也若雲霓

屋燕

呂氏春秋燕雀爭處于一屋之下子母相哺姁姁焉相樂以為安矣突決上焚棟宇燕雀顏色不變是何也不

知禍之將及已也

池魚

風俗通城門失火禍及池魚百家書宋城門失火汲取池水沃之魚悉露見因就取之故云禍及池魚

奔秦奔楚

瑣語智伯敗夢火見於西方乃出奔秦又夢火見於南方遂奔楚

爨柘爨松

淮南子曰夏爨柘燧火冬爨松燧火

神丘穴

括地圖神丘有火穴光照千里

臨邛井

見井

孫子墜營

孫子兵法火攻有五一曰火人二曰火積三曰火輜四曰火庫五曰火墜注云火人謂近草則燒之火積燒其

積聚火輜燒其輜重火庫燒敵兵庫火墜射火墜敵營也

管寧得島

傅子曰管寧嘗浮海遇暴風餘船皆沒莫知所適忽望見火光趨之得島島無居人又無火燼衆以為神光之祐

冒火伏柩

郡國志長沙古初父喪未葬隣家火起初冒火伏棺上



火乃滅又汝南先賢傳蔡君仲母終棺在堂西舍失火君仲伏棺號哭火越向東家按君仲順字

燃火塞戶

見篤學

燃石

拾遺記秦始皇時有宛渠之民乘蠡舟汎黑水而至始皇與之語及天地初開之時了如親見又曰臣之國去咸池日沒之所九萬里日月之所不照以萬歲為晝萬

歲為夜其晝則天豁然中開濶數百丈萬歲還合則為一日也夜則琢燃石以代日光此石出於燃山其土石皆有光明鑽斫之則火出火大如粟而輝耀一室

### 熒臺

郡國志連渾府遙火山西有火井深不見底炎氣上升常若微電以草爨之則煙騰火發名為熒臺

### 牧兒求羊

三輔黃圖秦始皇葬驪山六年之間為項羽所發牧兒

放羊而墮羊塚中燃火求羊擲葺被燒

官吏照燕

六帖秦始皇時吳宮吏以火照燕巢因燒吳宮

束帛而賀

韓詩外傳晉文公葺寶臺火公子晏束帛而賀曰王者  
藏於天下諸侯藏於百姓農夫藏於困庾商賈藏於篋  
櫃今百姓乏於外而賦斂無已皇天降災於葺臺是君  
之福也

竊樵以繼

梁書阮孝緒家貧無以爨僮僕竊隣人樵以繼火孝緒知之乃不食更令徹屋而炊

郭憲厭齊

汝南先賢傳郭憲從南郊舍酒東北三喫云齊失火以酒厭之後齊果上火事

圖澄救燕

晉書佛圖澄嘗與石季龍升中臺忽驚曰變變幽州當

火災乃取酒喫之久而笑曰救已得矣石季龍遣驗云  
邇日火從四門起西南有黑雲來驟雨滅之雨有酒氣

禳玄冥

左昭十八年鄭子產禳火於玄冥回祿注玄冥水神回  
祿火神

逐畢方

山海經章義之山有鳥如鶴一足赤文白喙名曰畢方  
見則其邑有譌火譌火妖火也故唐元和中元年永州

夏多火災柳子厚有逐畢方文

燒門

吳志張昭字子布孫權以公孫淵稱藩遣張彌許晏到  
遼東拜為燕王昭諫不從稱疾不朝權怒以土塞其門  
昭又於內以土封之後淵果殺彌晏權數慰謝昭固不  
起權以火燒其門恐之昭更閉戶權使人滅火親往問  
昭諸子扶起權載昭以還

改肆

舊唐書宋璟轉廣州都督廣舊以竹茅為屋屢有火災  
璟教人燒瓦改造店肆自是無復火患人皆懷惠

烏銜

拾遺記鄧竒字君珍喪親盡禮嘗去墓夜行有烏銜火  
夾之

羊轉

宋趙普一日見空中火一團又有一羔羊轉運其上乃  
拜曰普之罪也須臾火滅遂得疾而卒

得薪保焰

晉書嵇康從孫登遊三年將別登曰子識火乎火生而有光而不用其光果然在於用光人生而有才而不用其才果然在於用才故用光在乎得薪所以保其焰用才在乎識真所以全其年今子多才寡識難乎免於今之世康不能用果遭非命又戴逵曰火憑薪以傳焰人資氣以享年

起屋厭災



沈約宋書凡殿屋之上為圓泉方井魚荷花者以厭火災也

詣縣請備

鄭玄別傳玄年十七在家見大風起詣縣曰某時當有火災宜廣設禁備後火果起而不為害

入市言災

廣記天師翟乾祐因入夔州市謂人曰今夜有八人過此宜善待之是夕火燒百餘家八人乃火字也

償豕

後漢梁鴻字伯鸞扶風平陵人不為章句學牧豕林中  
誤遺火延及他舍鴻乃悉以豕償之隣家者老見鴻非  
恒人責讓主人悉還其豕鴻不受而去

驅雞

見將帥

周嵩投燭

晉書周顛弟嵩嘗因酒醉瞑目謂顛曰君才不及弟何

乃橫得盛名以所執蠟燭投之顛神色無忤徐曰阿奴  
火攻固出下策

彥回索輿

齊褚彥回宅失火煙焰逼甚左右驚擾彥回神色怡然  
索輿徐去

黔廬赭垣

唐柳子厚賀進士王參元失火書僕始聞而疑終乃大  
喜人多言足下家有積貨士之好廉名者皆畏忌不敢

道一出口則啞啞者以為得重賂今乃為天火之所滌  
蕩黔其廬赭其垣以示其無有而足下之才乃可以顯  
白而不污其實出矣是祝融回祿之陰相吾子也

壞牆穴牖

柳子曰永州多火災五年之間四為火所迫跣足出壞  
牆壁穴戶牖僅免燔灼一遇火災累日茫洋不能出言  
怨家所熬

齊沈冲吳興人與兄淡深並厯位中丞被案裁者多怨

沖母在東隣其家失火疑為人所藝乃大呼曰我三兒皆御史中丞與人豈有善者方恐肌分骨散何但焚如故論者曰沈母致懼中丞其戒深矣

奸民所為

宋張詠在金陵金陵多火災居者不安詠廉知皆奸民所為潛捕得之命先折其脛斬之以徇火患遂息

山堂肆考卷二十三